

---

**L A C A S S A N D R E**  
*Françoise, à sa Patrie.*

**I**E ne suis pas nation genereuze, ceste Cassandre Troyenne qui dans l'auâtage de predire l'avenir, a toujours eu le malheur de n'estre iamais creuë, ie suis Françoise, & n'ay pas encore veu Dieu mercy les Estrangers reduire ma patrie en cendre, ny mes ennemis exercer leur violence dans mes propres entrailles, i'ay gardé iusqu'icy ma chasteté pure & nette, à mon pays, à mon Roy, & celuy qui m'a donné la volonté de la conseruer, ne l'a pas exposee à la force de mes haineux : Aussi ne te viens-ie pas faire à croire que tu ayes tiré ton origine

A ij

458

•  
*du plicat*  
*not*  
*Catalogue*

des cendres d'Illion, ou receu ta puissance d'une nation que tes deuãciens ont rauagee tant de fois : car estant sur le point de te dire toutes tes veritez, voudrois-ie commencer par vne fable, & te faire des contes à dormir debout, lors que ie te veux réueiller de ton lethargique sommeil. Bien te diray-ie que tu n'es pas moins proche de ta ruine, que la grande Troye autre fois, si plus sage qu'elle tu ne crois ceux des tiens qui t'annõçans le malheur qui te talonne, t'enseignent en mesme tẽps les remedes propres à le contrequarrer, remedes tres-necessaires & que tu dois au moins te laisser appliquer, avant que la gangrene qui a desia gaigné la pluspart de tes membres, s'empare du principal, à sçauoir du cœur: car lors il n'y auroit plus de ressource, & tu ne pourrois plus eschapper à ta perte.

*Que Troye autrefois mise en cẽdre  
 Faute d'auoir creu sa Cassandre,  
 Serue d'exemple aux nations*

*Et que la France instruite d'elle  
Prefere mon aduis fidele*

459

*A ses aveugles passions.*

Aueugle que tu es, n'apperçois tu pas ce colosse que tes hayneux ont esleué iusques aux nuës? ce cheual enorme que leur deuotion feinte a consacré à Pallas? ne redoutes-tu pas vn present que les ennemis t'enuoyent, & que les cauteleux affublent du manteau de la religion, afin de te surprendre plus facilement, sçachant combien tu es respectueuse en ce qui la concerne.

*Ouvre l'œil dans tes maux presés  
Fais mieux qu'Ilion ta compagne  
France tu dois craindre l'Espagne  
Lors qu'elle te fait des presens.*

Veux-tu reietter le conseil de tes Laocoons, pour suiure l'aduis de certains, sinon estrangers apostez pour te seduire, ne croiras-tu pas ta Cassandre si digne que tu adioustes foy à ses paroles, puisque compatriote, puis-

que de sang royal. Ha ! chétive Cassandre que tu eusses esté bien plus heureuse d'auoir esté mescongne que recherchee d'Apollon , qu'il t'eust bien mieux valu demeurer muette & garder vn silence perpetuel que de faire des Propheties tant inutiles & trouuer ta patrie incredule à tes oracles trop certains , que si ie pensois n'auoir non plus de credit entre les miens , que toy jadis entre les tiens , que ie me garderois bien de me rompre la teste contre des murailles , & de me tuer le cœur & le corps sans rien faire : ie suis trop charitable envers ma patrie pour luy vouloir oster le moyen de se plaindre , & la priuer de la consolation ordinaire des miserables , à sçauoir de trouuer des excuses à leur faute & la reietter tousiours sur autrui ; Il reste encor quelque espoir de vie à cette maladie , & pourueu qu'elle n'aye pas perdu le iugement tout a fait , ie reconnois à son poux & à sa couleur qu'elle pourra receuoir vn iour sa guerison , ce ne sont



pas icy les premieres deffaillances  
qu'elle a souffertes , elle est eschap-  
pee autrefois de crizes presque aussi  
dangereuses. Reueille toy doncques,  
ô chere France . & pour prendre gar-  
de à ta conseruation, ou as-tu les yeux  
insensee de te rendre l'azyle de ce qui  
doit estre ta ruine? & de vouloir nour-  
rir vn serpent qui te fera mourir? Que  
n'es-tu sage au moins aux despens  
d'autrui , ne remarques-tu pas les  
fautes commises jadis par les Troyës,  
qui deceuz sous vn faux semblant de  
religion , & abusez par vne feinte &  
traistresse harangue , courent bride  
abbatuë à leur perte asseuree , se jet-  
tent à perte de veuë parmy les preci-  
pices , ferment les yeux pour ne pas  
trouuer le chemin de leur salut , & se  
bouchent les oreilles aux remonstrā-  
ces de leurs plus fideles conseillers.  
Espluche de près combien il y a peu  
de difference (*inter caballum & cabal-  
lam.*) Aye les mesmes considerations  
pour la cabale qui te menace de rui-  
ne , que Troye la deuoit auoir pour

462

le cheual qui fut cause de sa destruction: Rentre en toy-mesme, songe qu'elle n'a pris la couuerture de la pieté, & ne s'est approprié la robe des sciences, que pour mieux receler ses armes, qu'elle n'a estably son fondement sur le sacré nom du Sauueur que pour abolir vne nation qui a tousiours seruy de retraits à l'Eglise affligée, qu'elle ne fait profession de la paix que pour nous apporter la guerre avec moins de soupçon, & qu'elle ne recherche nostre amitié qu'afin de nous trahir plus seurement; Mais à quoy bons ces aduertissemens si tu l'as desia receuë en ton giron, & si tu luy as fait manger le pain de tes propres enfans, tandis qu'elle a commis des sacrileges sanglans contre la personne de tes souuerains; si disie tu l'as rappee, apres l'auoir honteusement bannie par Arrest solemnel du plus graue Senat del'vniuers, voire par vn Arrest que pour rendre plus celebre à la posterité l'on auoit graué dans vne Piramide plantee vis a vis du Palais

lais de ta Iustice. Tu l'as rappelee, ô France inconsiderée : mais que t'en est-il arriué ? Tout cela certes qui sçauroit arriuer de dangereux à vn corps Cacochime comme le tien, la perte de ton chef, la mort pitoyable du Grand HENRY, au commencement du plus glorieux dessein qui soit iamais monté en cœur d'homme, au milieu de ses gardes, & comme à couuert des iniures d'un trespas violent, par vne armee presque innombrable : que si Dieu ne nous eust laissé apres luy vn fils si digne de ce braue Pere, vn successeur si excellemment dotié de toutes sortes de vertus propres à gouuerner vn grand Estat, si durant ses plus ieunes années Dieu n'eust pourueu à la conseruation du Royaume par les sages conseils & les vertueuses resolutions de la Roynne mere, que fusses-tu deuenue ? Esclau sans doute du peuple bazané. A quel saint te fusses-tu voüee : puisque la cabale t'alloit immoler à Loyola ? Mais te persuades-tu qu'elle soit as-

souie du sang de deux roys meurtris  
l'un apres l'autre ? T'imagines tu  
que cette Lays puisse estre saoulee si  
iamais seulement elle n'est lassée de  
ses adulteres ? elle n'a garde de se con-  
tenter pour si peu , puisque elle ne  
fait que commencer , elle medite en-  
cor tous les iours des accidens aussi  
funestes que iamais, elle a bien l'impu-  
dence de menacer dans ses libelles de  
damnation eternelle la personne de  
ton Roy, Roy le plus digne du Ciel  
que la France aye iamais veu regner ,  
elle s'émancipe d'escrire publique-  
ment, voire de parler tout hautement  
contre les iustes desseins de ton sou-  
uerain, & tu es si stupide que tu l'en-  
dures , & si nonchalante que tu ne  
daignes y apporter de remede : mais  
ie ne m'en estonne pas, veu les indi-  
gnitez plus grandes de beaucoup que  
tu as souffertes par le passé ; Toutes-  
fois s'il te restoit encore quelque es-  
tincelle de iugement, tu remarque-  
rois aisement qu'elle reprend ses pre-  
mieres erres, & qu'elle est aussi pre-



paree que iamais , à faire de meschans coups : n'abuse pas ie te prie de la patience de Dieu, & ne pense pas que te donnant les moyens d'éuiter vn malheur, où tu es souuent retombee , il entende que tu n'en tiennes conte , prens garde que la tardiueté de sa colère ne te rende plus violente, & que pour chastiment de ta negligence il ne te laisse croupir eternellement dās le gouffre où tute ietes la teste baillsee: Dessille en fin tes yeux, & ne te laisse plus ainsi beffler, voy le ventre creux de cette cabale maudite prest à vomir vne armee ennemie en ton sein, & qui prendra son temps lors que tu y penseras le moins, lors dis-ie que tu ieras enseuely dans le vin & dans le sommeil.

*Inuadunt urbē somno vinoque sepultam.*

Elle a desia corrompu quantité de tes enfans, elle a pratiqué de longue main dans ta propre maison nombre d'Æneas & de traistres, plus helas ! mille fois qu'il n'en seroit de besoin, elle a des espions iusques dans tes plus

secrets conseils, & tant de partisans dans l'Estat, qu'il égale voire surpasse le nombre de ceux qui te gardent vne inuiolable fidelité. Il est facile neantmoins de t'en deffaire si tu as assez de courage pour seconder la deliberation de ceux qui ont éuenté la mine, tu n'as qu'à deschirer hardy-ment tes entrailles de ce colosse superbe, qu'à creuer ses boyaux, qu'à écarbouiller ce qui en sortira : tu ne dois pas simplement le chasser de ton foyer, tu dois, tu dois le mettre en pieces tandis que tu l'as entre tes mains, il luy faut faire regorger le sang de nos roys, dont il s'est abreuvé à nos despens, & venger tout d'un coup les maux qu'il nous a brassés depuis vn si long temps. Que si tu ne mets en execution le salutaire conseil que ie te donne icy, si tu manques de resolution dans vne entreprise si necessaire, si tu t'endurcis contre mes remonstrances, & t'opiniastres en ta peyne propre, sçaches que iamais le cousteau ne bougera de ta maison, &

qu'après auoir veu tes enfans s'entre-  
 déchirer les vns les autres par les frau-  
 duleuses menees des cabalistes, celuy  
 qui ne l'a inuentee que pour te per-  
 dre, se iettera sur toy durant tes foi-  
 bleses, & acheuera d'espuiser tes vei-  
 nes iusqu'à la dernière goutte.

*Vn traistre cheual autres-fois  
 Receu en amy dedans Troye,  
 La donna de nuiet toutesfois  
 Aux Grecs ses ennemis en proye.  
 Vne cabale plus traistresse  
 Receue en France à bras ouuers  
 Par des chemins sourds & couuers  
 En rendra l'Espagne maistresse.*

Et vous grand R OY quitenez les  
 resnes de cette puissante Monarchie,  
 puisque sa ruine ou sa conseruation  
 vous touche plus qu'à pas vn autre,  
 prenez y garde soigneusement, retrā-  
 chez hardyment du corps de vostre  
 Estat les membres qu'il y a de pour-  
 rys, de peur que ce qu'il y a de sain &  
 d'entier n'en demeure infecté.

*Il vaut mieux couper vn membre  
que tout le corps perisse.*

Chassez au loing cét ennemy qui  
feme de l'yuroye dans le cœur des  
François, si vous n'aymez mieux le  
liurer au supplice, pour le châstier se-  
lon ses execrables meschancetez. Ne  
craignez pas qu'il vous en mesarriuë,  
le venin de ce basilic n'infecte que les  
lieux où il habite, si le feu Roy Hen-  
ry le Grand que Dieu absolue eust te-  
nu ferme dans sa premiere resolution  
& ne se fust pas laissé emporter aux  
persuasions du cauteleux Sinon, nous  
ne l'eussions pas veu massacrer mise-  
rablement sans le pouuoir secourir :  
comme le cheual d'Epeus ne pouuoit  
nuire aux Troyens que dans l'enceint  
de leurs murailles. Cette cabale non  
plus ne nous sçauroit faire le moin-  
dre desplaisir du monde, que tan-  
dis que nous la souffrirons dans  
nos entrailles, elle ne peut estre que  
tres inutile à ceux qui ont prist tant de  
peine à en ioindre les pieces. Quel



mal a t'elle sceu faire iusqu'icy à la re-  
publique de Venize, qui l'a bannie à  
perpetuité de toutes les terres de son  
obeyssance, Resoudez-vous dōcques  
courageusement, SIRE, à faire re-  
mettre sus l'Arrest de vostre Parle-  
ment contre ces assassins, comman-  
dez qu'on redresse la Piramide abba-  
tuë, que l'on y graue pour iamais la  
sentence prononcee contr'eux avec  
tant de solemnité, & qu'on y adiou-  
ste cette clause necessaire, que celuy  
soit tenu pour infame & pour anathe-  
me qui parlera iamais de leur resta-  
blissement. Ainsi vous regnerez pai-  
sible dans vostre Estat, & sentirez les  
benedictions du Ciel deualer sans fin  
sur vostre chef, vous ferez chery, re-  
peré, & prisé de tous vos suiets, com-  
me redouté de vos ennemis, & vostre  
France repurgee de monstres par vo-  
stre vertu, fleurira plus que iamais en  
hommes droicturiers & valeureux, &  
raffermie sur ses fondemēs vous verra  
reconquerir ce que la perfidie de ses  
ennemis a rauy à vos ancestres, vostre

Empire reprendra les anciennes bornes que Charlemagne luy auoit donnees, & sa duree n'en aura point d'autres que celles du temps, vous viurez glorieux en ce monde, & lors que vous serez rassasié de iours, vous laisserez le Royaume paisible à vos successeurs, & changerez la couronne terrestre à la celeste que Dieu prepare à vos merites, vostre loüange demeurera celebre en la memoire des hommes, & de bouche en bouche paruiendra iusqu'à la derniere posterité. Puissiez vous ô grand Roy, prendre cette genereuse resolution, afin que vostre iustice & vostre valeur remplissent les cœurs de tous les bõs François de vœux & de prieres pour la prosperité de vostre regne, & pour la conseruation de vostre sacrée personne.

